

LIGJ
Nr.9223, datë 29.4.2004

**PËR DISA NDRYSHIME DHE SHTESA NË LIGJIN NR.8530, DATË 23.9.1999 "PËR
SHËRBIMIN POSTAR NË REPUBLIKËN E SHQIPËRISË"**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr.8530, datë 23.9.1999 "Për shërbimin postar në Republikën e Shqipërisë", bëhen këto ndryshime dhe shtesa:

Neni 1

Në nenin 3 bëhen këto ndryshime e shtesa:

1. Pika 14 e nenit 3 ndryshohet si më poshtë:

"14. "Shërbime të rezervuara" nënkupton shërbimet e kryera ekskluzivisht nga operatori publik i postave, për të përmbushur detyrimin e shërbimit bazë për pranimin, përpunimin, transportin dhe dorëzimin e objekteve të korrespondencës së brendshme, me çmim dhe kufi peshe, siç përcaktohet në vendimin e Këshillit të Ministrave."

2. Pas pikës 18 shtohen pikat 19 dhe 20 si më poshtë:

"19. "Licencë individuale" nënkupton të drejtën që i jepet çdo subjekti juridik, vendas ose i huaj, që plotëson kërkesat e legjislacionit shqiptar për shërbimet postare, për ofrimin e shërbimeve të tjera nga ato të rezervuara, që përfshihen në shërbimin bazë postar.

20. "Licencë e përgjithshme" nënkupton të drejtën që i jepet çdo subjekti fizik ose juridik, vendas apo i huaj, që plotëson kërkesat e legjislacionit shqiptar për shërbimet postare, për ofrimin e shërbimeve të tjera nga ato të rezervuara, që nuk përfshihen në shërbimin bazë postar."

Neni 2

Shkronja "b" e pikës 1 të nenit 11 ndryshohet si më poshtë:

"b) të ketë të drejtën e transportimit të objekteve të thjeshta të postës së letrave të brendshme, në peshën që do të përcaktohet në vendimin e Këshillit të Ministrave. Këtu përfshihen dhe objektet e postës së drejtpërdrejtë."

Neni 3

Titulli i kreut V bëhet "Licencat" dhe titulli i nenit 16 bëhet "Licenca individuale".

Neni 4

Neni 17 i ligjit ndryshohet si më poshtë:

"Neni 17

Licencat e përgjithshme

1. Shërbimet e tjera postare, që nuk përfshihen në shërbimin bazë postar, ushtrohen pas dhënies së licencës së përgjithshme nga ministri.

2. Procedura për dhënien e licencës së përgjithshme përcaktohet nga ministri.

3. Një licencë e përgjithshme mund t'i jepet një personi fizik ose juridik, i cili:

a) plotëson kërkesat themelore të konfidencialitetit, të sigurisë dhe të mbrojtjes së të dhënave, si dhe respekton të drejtat ekskluzive që i jepen operatorit publik;

b) plotëson kërkesat e nevojshme, sipas legjislacionit në fuqi, për të ushtruar veprimtarinë postare.

4. Ofruesi i shërbimit është i detyruar të njoftojë DPPT-në për pezullimin dhe përfundimin e veprimtarisë së tij të paktën 30 ditë para marrjes së një veprimi të tillë.

5. Ofruesi i shërbimit duhet t'ia paraqesë tarifat për dijeni DPPT-së të paktën 15 ditë para vënies së tyre në zbatim, si dhe të japë çdo informacion, që i kërkohet nga ajo për kryerjen e funksioneve të saj.

6. Një ofrues i shërbimit, që ofron shërbimet në bazë të një licence individuale, sipas nenit 16 të këtij ligji, nuk ka nevojë për licencë të përgjithshme nga ministri, siç parashikohet në këtë nen.”.

Neni 5

Në të gjithë tekstin e ligjit, fjala "licencë" zëvendësohet me fjalët "licencë individuale" dhe fjala "leje" zëvendësohet me fjalët "licencë e përgjithshme".

Neni 6

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr.4230, datë 26.5.2004 të Presidentit të Republikës së Shqipërisë,
Alfred Moisiu**